

PRESTASI PERDAGANGAN MALAYSIA, MAC 2022

Jumlah perdagangan Malaysia pada Mac 2022 kekal kukuh dengan pertumbuhan memberangsangkan 27.3 peratus, mencecah RM236.6 bilion berbanding RM185.8 bilion pada tahun sebelumnya. Eksport dan import merekodkan jumlah tertinggi dalam sejarah dengan masing-masing bernilai RM131.6 bilion dan RM104.9 bilion. Prestasi eksport terus berkembang dengan 24.5 peratus, manakala import melonjak 29.9 peratus. Seterusnya, imbalan perdagangan mencatatkan lebih RM26.7 bilion, bertumbuh 10.3 peratus berbanding tahun sebelumnya.

Berbanding Februari 2022, eksport, import, jumlah dagangan dan lebih dagangan merekodkan peningkatan ketara pada Mac 2022. Eksport meningkat 28.7 peratus manakala import memulih kepada 27.3 peratus. Sementara itu, jumlah perdagangan dan lebih dagangan masing-masing meningkat 28.1 peratus dan 34.8 peratus.

Jumlah dagangan, eksport, import dan lebih dagangan bagi suku tahun pertama 2022 bertumbuh kukuh berbanding tempoh yang sama pada 2021. Eksport berkembang 22.2 peratus, import (+25.2%), jumlah dagangan (+23.6%) manakala lebih dagangan meningkat 10.9 peratus.


A. EKSPORT

**Nilai eksport yang kukuh pada RM131.6 bilion,
Berkembang 25.4 peratus pada Mac 2022**


1. Prestasi Eksport

Eksport Malaysia mencatatkan peningkatan 25.4 peratus dan berjumlah RM131.6 bilion berbanding Mac 2021. Peningkatan ini didorong terutamanya oleh eksport domestik yang bernilai RM106.9 bilion. Selain itu, eksport semula bertumbuh 38.0 peratus dan bernilai RM24.7 bilion. Eksport meningkat 28.7 peratus atau RM29.4 bilion berbanding bulan sebelumnya. Analisis pelarasan musim bulan ke bulan menunjukkan eksport meningkat 10.8 peratus untuk mencecah RM127.6 bilion.

Carta 1 Eksport Domestik, Eksport Semula (RM bilion) dan Perubahan Tahunan (%)



Carta 2 Nilai Eksport Asal dan Nilai Eksport Pelarasan Musim, RM bilion



2. Prestasi Eksport mengikut Negara Destinasi Utama


Singapura dan China adalah negara destinasi utama pada Mac 2022 dengan jumlah sumbangan 28.8 peratus kepada jumlah eksport Malaysia.

Eksport ke Singapura yang mewakili 15.3 peratus daripada jumlah eksport dengan nilai RM20.1 bilion berkembang 34.0 peratus. Ia diterajui oleh eksport yang lebih tinggi bagi barangan elektrik & elektronik (+RM3.3 bilion, +42.2%); keluaran petroleum (+RM1.1 bilion, +70.3%) dan jentera, peralatan & kelengkapan (+RM421.5 juta, +41.7%).

Eksport ke China menyumbang 13.5 peratus kepada keseluruhan eksport dengan nilai RM17.8 bilion, merekodkan peningkatan 10.7 peratus atau RM1.7 bilion tahun ke tahun. Prestasi tersebut didorong oleh eksport yang lebih tinggi bagi barangan elektrik & elektronik (+RM2.5 bilion, +47.7%) dan minyak kelapa sawit & hasil keluaran berasaskan minyak kelapa sawit (+RM711.8 juta, +239.1%).

Daripada sepuluh negara destinasi utama, perubahan tahunan untuk sembilan negara menunjukkan pertumbuhan dua digit.

Carta 3 Perubahan Tahunan Eksport mengikut Negara Utama, Mac 2021 dan Mac 2022




3. Eksport ke Negara-negara ASEAN

Eksport ke negara ASEAN yang meliputi 29.9 peratus daripada jumlah eksport Malaysia mencatatkan nilai RM39.3 bilion dengan pertumbuhan 37.7 peratus. Prestasi tersebut dipacu oleh barangan elektrik & elektronik yang berkembang 39.9 peratus atau RM4.5 bilion, diikuti oleh keluaran petroleum (+RM2.5 bilion, +97.2%); kondensat & minyak petroleum lain (+RM789.7 juta, +844.0%); kimia & bahan kimia (+RM500.2 juta, +20.4%) dan minyak kelapa sawit & keluaran pertanian berasaskan minyak kelapa sawit (+RM427.4 juta, +97.4%).

Singapura menyumbang 51.2 peratus kepada keseluruhan eksport negara ASEAN dengan RM20.1 bilion mencatatkan pertumbuhan memberangsangkan 34.0 peratus berbanding tahun sebelumnya.

Carta 4 Pembahagian Peratusan Eksport, Mac 2022




4. Prestasi Eksport mengikut Sektor Ekonomi

Eksport barangan perkilangan meningkat 19.1 peratus atau RM17.6 bilion pada Mac 2022 dan seterusnya meliputi 83.2 peratus daripada jumlah eksport. Ia dirangsang oleh pertumbuhan pesat barangan elektrik & elektronik (+RM13.0 bilion, +32.8%) yang menyumbang 40.1 peratus kepada nilai eksport. Selain itu, prestasi ini turut dirangsang oleh keluaran petroleum (+RM4.6 bilion, +96.5%); produk perkilangan berasaskan minyak sawit (+RM1.1 bilion, +41.4%) dan jentera, kelengkapan & alat ganti (+RM655.4 juta, +14.5%).

Sementara itu, eksport hasil perlombongan yang mewakili 8.2 peratus daripada jumlah eksport mencatatkan pertumbuhan kukuh 105.8 peratus kepada RM10.8 bilion. Ia didorong oleh eksport yang lebih tinggi gas asli cecair (+RM2.5 bilion, +100.5%); petroleum mentah (+RM1.6 bilion, +92.5%) dan kondensat & minyak petroleum lain (+RM789.7 juta, +844.0%).

Eksport keluaran pertanian mencatatkan pertumbuhan 41.8 peratus atau RM3.1 bilion menyumbang 8.1 peratus pada Mac 2022. Ia disokong oleh eksport yang lebih tinggi minyak kelapa sawit & hasil pertanian berasaskan minyak kelapa sawit dengan 55.9 peratus di samping kayu balak dengan 127.6 peratus. Walau bagaimanapun, eksport makanan laut, segar, sejuk atau beku dan minyak sayuran lain masing-masing merosot 12.7 peratus dan 10.0 peratus.

Paparan 1 Eksport mengikut Sektor, Mac 2021 dan Mac 2022



5. Eksport mengikut Produk Utama Terpilih

Peningkatan kukuh dalam prestasi eksport pada Mac 2022 adalah dipengaruhi oleh pertumbuhan positif produk berikut:

- Barangan elektrik & elektronik (40.1% daripada jumlah eksport), berkembang 32.8 peratus (+RM13.0 bilion) kepada RM52.8 bilion;
- Keluaran petroleum bertapis, yang menyumbang 6.4 peratus kepada jumlah eksport, berkembang RM4.4 bilion atau 106.2 peratus kepada RM8.5 bilion sejajar dengan peningkatan nilai purata seunit (+83.7%) dan volum eksport (+12.3%);
- Minyak kelapa sawit & hasil keluaran berasaskan minyak kelapa sawit (9.3% daripada jumlah eksport) meningkat RM4.1 bilion (+51.2%) kepada RM12.2 bilion. Eksport minyak sawit, komoditi utama dalam kumpulan produk ini meningkat RM3.1 bilion atau 69.2 peratus seiring dengan kenaikan nilai purata seunit (+50.6%) dan volum eksport (+12.3%);
- Gas asli cecair, mencakupi 3.9 peratus daripada jumlah eksport, meningkat RM2.5 bilion atau 100.5 peratus selaras dengan pertumbuhan nilai purata seunit (+68.1%) dan volum eksport (+19.3%);
- Petroleum mentah, meliputi 2.5 peratus kepada jumlah eksport, naik RM1.6 bilion atau 92.5 peratus kepada RM3.2 bilion seiring dengan peningkatan nilai purata seunit (+79.6%) dan volum eksport (7.2%).
- Kayu & hasil keluaran kayu yang menyumbang 1.8 peratus kepada jumlah eksport meningkat 6.8 peratus atau RM152.8 juta kepada RM2.4 bilion; dan
- Getah asli (0.3% daripada jumlah eksport) meningkat perlahan RM5.3 juta atau 1.3 peratus selari dengan peningkatan dalam nilai purata seunit (+11.8%). Sebaliknya, volum eksport menurun 9.4 peratus.

Paparan 2 Eksport mengikut Produk Utama Terpilih, Mac 2021 dan Mac 2022

Sumbangan	40.1%	9.3%	6.4%	3.9%	1.8%	2.5%	0.3%
	Barangan Elektrik & Elektronik	Minyak Kelapa Sawit & Hasil Keluaran Berasaskan Minyak Kelapa Sawit	Keluaran Petroleum Bertapis	Gas Asli Cecair	Kayu dan Hasil Keluaran Kayu	Petroleum Mentah	Getah Asli
	RM billion	RM billion	RM billion	RM billion	RM billion	RM billion	RM billion
Mac 2022	52.8	12.2	8.5	5.1	2.4	3.2	0.4
Mac 2021	39.8	8.1	4.1	2.5	2.3	1.7	0.4
	y-o-y (%)	y-o-y (%)	y-o-y (%)	y-o-y (%)	y-o-y (%)	y-o-y (%)	y-o-y (%)
	+32.8	+51.2	+106.2	+100.5	+6.8	+92.5	+1.3
	+47.9	+49.9	-43.0	-27.8	41.9	-26.9	43.9

B. IMPORT


Import terus meningkat 29.9 peratus pada Mac 2022, berjumlah RM104.9 bilion

1. Prestasi Import


Nilai import Malaysia pada Mac 2022 mencecah RM104.9 bilion dan seterusnya mencatatkan pertumbuhan memberangsangkan 29.9 peratus. Pertumbuhan dua digit 27.3 peratus turut direkodkan bagi bulan ke bulan. Berdasarkan analisis terma pelarasan musim bulan ke bulan, import meningkat 13.8 peratus kepada RM105.0 bilion.

Import mengikut penggunaan akhir bagi tiga kategori utama iaitu barangan perantaraan, barangan penggunaan dan barangan modal mencatatkan pertumbuhan kukuh pada 30.5 peratus kepada RM77.1 bilion.

Carta 5 Import, Nilai (RM bilion) dan Perubahan Tahunan (%)



Carta 6 Nilai Import Asal dan Nilai Import Pelarasan Musim, RM bilion



2. Prestasi Import mengikut Negara Asal Utama


China dan Singapura kekal sebagai dua negara asal utama bagi import Malaysia pada Mac 2022, dengan jumlah sumbangan 30.0 peratus kepada jumlah import.

Import dari China yang mewakili 20.2 peratus daripada import Malaysia, berkembang 19.3 peratus untuk mencecah RM21.2 bilion. Pertumbuhan ini dirangsang oleh barangan elektrik & elektronik yang meningkat 25.6 peratus atau RM1.7 bilion, kimia & bahan kimia (+RM967.5 juta, +67.3%) dan jentera, kelengkapan & peralatan (+RM370.8 juta, +20.5%).

Import dari Singapura meningkat 28.5 peratus kepada RM10.2 bilion, justeru menyumbang 9.8 peratus kepada import Malaysia. Prestasi ini berikutan import yang lebih tinggi barangan elektrik & elektronik (+RM1.5 bilion, +72.3%) dan produk petroleum (+RM792.5 juta, +46.5%).

Perubahan tahunan import bagi empat negara asal utama mencatatkan pertumbuhan dua digit. Selain itu, import daripada Republik Korea serta Arab Saudi memulih berbanding pertumbuhan negatif pada tahun sebelumnya.

Carta 7 Perubahan Tahunan Import mengikut Negara Asal Utama, Mac 2021 dan Mac 2022




3. Import dari Negara-negara ASEAN

Import dari negara ASEAN melonjak 37.5 peratus pada Mac 2022 kepada RM26.4 bilion. Ia meliputi 25.2 peratus daripada import Malaysia. Prestasi tersebut disumbangkan terutamanya oleh barangan elektrik & elektronik (+RM2.0 bilion, +45.7%); produk petroleum (+RM1.4 bilion, +62.6%); kimia & bahan kimia (+RM516.1 juta, +30.8%); jentera, peralatan & kelengkapan (+RM505.8 juta, +54.3%) dan minyak kelapa sawit & hasil pertanian berasaskan minyak kelapa sawit (+RM340.2 juta, +45.0%).

Singapura menyumbang 38.7 peratus dari import Malaysia, diikuti Indonesia (25.5%), Thailand (20.3%) dan Vietnam (8.9%).

Carta 8 Pembahagian Sumbangan Import, Mac 2022



4. Prestasi Import mengikut Sektor Ekonomi


Pengembangan import disebabkan oleh import yang lebih tinggi bagi semua sektor utama pada Mac 2022.

Barangan perkilangan yang merangkumi 81.8 peratus daripada jumlah import, meningkat 24.9 peratus daripada RM68.7 bilion kepada RM85.8 bilion tahun ke tahun. Ini disokong oleh import yang tinggi barangan elektrik & elektronik (+RM7.1 bilion, +28.8%); keluaran petroleum (+RM3.0 bilion, +48.8%); kimia & bahan kimia (+RM2.2 bilion, +26.5%) dan jentera, kelengkapan & peralatan (+RM1.6 bilion, +28.8%).

Import hasil perlombongan berjumlah RM11.6 bilion, merekodkan pertumbuhan mapan 275.5 peratus berbanding tahun sebelumnya dan seterusnya mencakupi 11.0 peratus daripada import Malaysia. Ia dipacu terutamanya oleh pengembangan dalam import petroleum mentah iaitu 1,163.5 peratus atau RM6.1 bilion.

Import keluaran pertanian (5.9% daripada jumlah import) terus berkembang 21.0 peratus atau RM1.1 bilion tahun ke tahun kepada RM6.2 bilion, dipacu oleh peningkatan import minyak kelapa sawit & hasil pertanian berasaskan minyak kelapa sawit (+RM442.3 juta, +55.4%) dan minyak sayuran lain (+RM154.0 juta, +43.4%).

Paparan 3 Import mengikut Sektor, Mac 2021 dan Mac 2022



5. Import mengikut Klasifikasi Penggunaan Akhir & Kategori Ekonomi Umum (BEC)

Jumlah import pada Mac 2022 bernilai RM104.9 bilion, meningkat 29.9 peratus tahun ke tahun. Tiga kategori utama import mengikut Penggunaan Akhir yang merangkumi 73.5 peratus daripada jumlah import adalah:

Barangan perantaraan, bernilai RM58.9 bilion atau 56.1 peratus daripada jumlah import, meningkat 34.9 peratus disebabkan oleh kenaikan import bahan api & pelincir, utama (+RM6.8 bilion, +502.9%); alat ganti & aksesori barangan modal (kecuali peralatan pengangkutan) (+RM3.8 bilion, +32.6%); bekalan industri, diproses (+RM1.3 bilion, +6.5%); alat ganti & aksesori untuk alat kelengkapan pengangkutan (+RM1.0 bilion, +38.8%) dan bahan api & pelincir, diproses, lain-lain (+RM975.3 juta, +47.1%).

Barangan penggunaan, berjumlah RM8.7 bilion (8.3% daripada jumlah import), mencatatkan kenaikan 22.4 peratus, disebabkan oleh import yang lebih tinggi makanan & minuman, diproses, khusus untuk penggunaan isi rumah (+RM723.6 juta, +34.7%); barangan tidak tahan lama (+RM416.3 juta, +24.0%) dan barangan separa tahan lama (+RM399.2 juta, +42.3%).

Barangan modal, berjumlah RM9.5 bilion (9.1% daripada jumlah import) meningkat 14.3 peratus, disumbangkan oleh import barangan modal (kecuali peralatan pengangkutan) yang lebih tinggi (+RM970.8 juta, +12.0%) serta kelengkapan pengangkutan, perindustrian (+RM221.2 juta, +91.7%).